

Entrante promer di Juni compania lo haya gerencia interino

Director di SETAR a pidi traslado

Ta busca Arubiano pa reemplace

ORANJESTAD(AAN)—
Entrante Promer di Juni Setar lo conoce un Gerencia Interino. Esaki despues cu e Director di Setar, Ing. Edwin Croes, a pidi Gobierno traslade. Awor e lo bira consehero pa maneho di Gobierno.

Algun siman pasa, Ing. Edwin Croes a dicidi di acerca Gobierno cu e peticion pa traslade. Aparentemente e no ta contento ni feliz den su actual posi-

cion y pesey lo a prefera otro trabau.

E peticion voluntario a worde discuti den seno di Consejo di Ministro, cu a dicidi di honra e peticion aki. Esey kier meen cu entrante Promer di Juni, Ing. Croes lo cumenza traha como consehero di Gobierno pa asuntonan di Telecomunicacion, mientras un gerencia interino lo keda encarga cu asuntonan diario di Setar.

Segun DIARIO tin entendi, e peticion di Croes a drenta den forma di sorpresa cerca Gobierno cu lo tin poco problema pa ariba termino corto reemplaza Croes cu un Arubiano experto den e ramo. Otro problema ta, cu actualmente varios proyecto ariba tereno di Telecomunicacion ta worde desaroya, loke ta exige tambe tur esfuerzo di esnan cu ta dirigi Setar.

Pa por atende e problema a dicidi cu lo introduci un gerencia temporal pa Setar, mientras ta busca un Arubiano califica pa pone den e funcion. A worde pensa den direccion di Nepostel di Hulanda, cu, mientras Gobierno ta busca un Arubiano profesional, ta atende e marcha di e compania.

Lo trata pa tan pronto cu ta posible yega na un

solucion definitivo pa gerencia di Setar, caminda varios proyecto importante ta worde desaroya.

Mientrastanto tabata tin rumor ta circula cu ta Gobierno a dicidi di hala Ing. Croes un banda. E rumornan aki ta completamente falso, segun fuentenan digno di credito, cu a muestra cu Ing. Croes ta e persona cu a tuma e iniciativa pa pidi su traslado pa motibonan personal.